

飲冰室文集

八



飲冰室文集卷八目錄

辛丑集上

過渡時代論

葉

一 過渡時代之定議

一

二 過渡時代之希望

一

中三 過渡時代之危險

一

四 各國過渡時代之經驗

二

五 過渡時代之中國

二

六 過渡時代之人物與其必要之德性

三

滅國新法論

六

國家思想變遷異同論

二十

清議報第一百冊祝辭并論報館之責任及本館之經歷

二九

第一 祝典之通例及其關係 二九

第二 報館之勢力及其責任 三十

第三 中國報館之沿革及其價值 三二

第四 清議報之性質 三四

第五 清議報時代中外之歷史 三五

第六 結論 三七

中國史叙論 三八

第一節 史之界說 三八

第二節 中國史之範圍 三八

第三節 中國史之命名 三九

第四節 地勢 三九

第五節 人種 四一

第六節 紀年 四三

第七節 史以前之時代 四四

第八節 時代之區分 四六

堯舜爲中國中央君權濫觴考 四八

政治學案 五三

霍布士學案 五三

斯片挪莎學案 五八

盧梭學案 六十

飲冰室文集卷八目錄終

論中國之政治
六十六

論中國之教育
正八

論中國之經濟
正三

論中國之社會
正三

論中國之文化
四八

論中國之政治
四六

論中國之教育
四四

論中國之經濟
四三

飲冰室文集卷八

辛丑集上

新會 梁啓超 著

過渡時代論

一 過渡時代之定議

今日之中國過渡時代之中國也。

過渡有廣狹二義。就廣義言之。則人間世無時無地而非過渡時代。人羣進化。級級相嬗。譬如水流。前波後波。相續不斷。故進步無止境。卽過渡無已時。一日不過渡。則人類或幾乎息矣。就狹義言之。則一羣之中。常有停頓與過渡之二時代。互起互伏。波波相續體。是爲過渡相。各波具足體。是爲停頓相。於停頓時代而膨脹力即漲之現象顯焉。於過渡時代而發生力之現象顯焉。歐洲各國自二百年以來。皆過渡時代也。而今則其停頓時代也。中國自數千年以來。皆停頓時代也。而

今則過渡時代也。

二 過渡時代之希望

過渡時代者。希望之湧泉也。人間世所最難遇而可貴者也。有進步則有過渡。無過渡亦無進步。其在過渡以前。止於此岸。動機未發。其永靜性何時始改。所難料也。其在過渡以後。達於彼岸。躊躇滿志。其有餘勇可賈與否。亦難料也。惟當過渡時代。則如鯤鵬圖南。九萬里而一息。江漢赴海。百千折以朝宗。大風泱泱。前途堂堂。生氣鬱蒼。雄心喬皇。其現在之勢力圈。矢貫七札。氣吞萬牛。誰能禦之。其將來之目的地。黃金世界。荼錦生涯。誰能限之。故過渡時代者。實千古英雄豪傑之大舞臺也。多少民族由死而生。由剝而復。由奴而主。由瘠而肥。所必由之路也。美哉過渡時代乎。

三 過渡時代之危險

抑過渡時代。又恐怖時代也。青黃不接。則或受之饑。卻曲難行。則惟茲狼狽。風利

不得泊。得毋滅頂滅鼻之懼。馬逸不能止。實維躡山躡壑之憂。摩西之彷徨於廣漠。閣龍之漂泛於泰洋。賭萬死以博一生。斷後路以臨前敵。天下險象。甯復過之。且國民全體之過渡。以視個人身世之過渡。其利害之關係。有更重且劇者。所向之鵠若誤。或投網以自戕。所導之路若差。或迷途而靡屆。故過渡時代。又國民可生可死可剝可復可奴可主可瘠可肥之界線。而所爭間不容髮者也。

四 各國過渡時代之經驗

船頭坎坎者。自由之鼓耶。船尾舒舒者。獨立之旗耶。當十八十九兩世紀中。相銜相逐相提攜。乘長風衝怒濤。以過渡於新世界者。非遠西各國耶。順流而渡者。其英吉利耶。亂流而渡者。其法蘭西耶。方舟聯隊而渡者。其德意志意大利瑞士耶。攘臂馮河而渡者。其美利堅匈牙利耶。借風附帆而渡者。其門的內哥塞爾維亞希臘耶。維也納溫和會議所不能遏。三帝國神聖同盟所不能禁。拿破崙席捲囊括之戰畧所不能撓。梅特涅飼狙象虎之政術所不能防。或渡一次而達焉。或渡

兩三次而始達焉。或渡一關而止焉。或渡兩三關而猶未止焉。或中途逢大敵。血戰突圍而逕渡焉。或發端遇挫折。捲土重來而卒渡焉。吾讀水滸傳。宋公明何以破祝莊。吾讀西游記。唐三藏何以到西域。吾以是知過渡之非易。吾以是知過渡之非難。我陟高丘。我瞻彼岸。樂土樂土。先鞭已屬他人。歸歟歸歟。座位尙容卿輩。角聲動地。提耳以喚魂兮。巾影漫天。招手而邀叩涉。河漢清且淺。相去復幾許。盈盈一水間。脉脉不得語。望門大嚼。我勞如何。

五 過渡時代之中國

今世界最可以有爲之國。而現時在過渡中者有二。其一爲俄羅斯。俄國自大彼得及亞歷山大第二以來。幾度厲行改革。輸入西歐文明。其國民腦中漸有所謂世界公理者。日浸月潤。愈播愈廣。不可遏抑。而其重心力實在於各學校之學生。今世識微之士。謂俄羅斯將達於彼岸之時不遠矣。其二則爲我中國。中國自數千年來。常立於一定不易之域。寸地不進。跬步不移。未嘗知過渡之爲何狀也。雖

然爲五大洋驚濤駭浪之所衝激。爲十九世紀狂飈飛沙之所驅突。於是穹古以來。祖宗遺傳。深頑厚錮之根據地。遂漸漸摧落失陷。而全國民族。亦遂不得不經營慘憺。跋涉苦辛。相率而就於過渡之道。故今日中國之現狀。實如駕一扁舟。初離海岸綫。而放於中流。卽俗語所謂兩頭不到岸之時也。語其大者。則人民既憤獨夫民賊愚民專制之政。而未能組織新政體以代之。是政治上之過渡時代也。士子既鄙考據詞章庸惡陋劣之學。而未能開闢新學界以代之。是學問上之過渡時代也。社會既厭三綱壓抑虛文縉節之俗。而未能研究新道德以代之。是理想風俗上之過渡時代也。語其小者。則例案已燒矣。而無新法典。科舉議變矣。而無新教育。元兇處刑矣。而無新人才。北京殘破矣。而無新都城。數月以來。凡百舉措。無論屬於自動力者。屬於他動力者。殆無一而非過渡時代也。故今日我全國人可分爲兩種。其一老朽者流。死守故壘。爲過渡之大敵。然被有形無形之逼迫。而不得不涕泣以就過渡之途者也。其二青年者流。大張旗鼓。爲過渡之先鋒。然

受外界內界之刺激。而未得實把握以開過渡之路者也。而要之中國自今以往。日益進入於過渡之界綫。離故步日以遠。衝盤渦日以急。望彼岸日以親。是則事勢所必至。而絲毫不容疑義者也。以第二節之現象言之。可愛哉。其今日之中國乎。以第三節之現象言之。可懼哉。其今日之中國乎。

六 過渡時代之人物與其必要之德性

時勢造英雄耶。英雄造時勢耶。時勢英雄。遞相爲因。遞相爲果耶。吾輩雖非英雄。而日日思英雄。夢英雄。禱祀求英雄。英雄之種類不一。而惟以適於時代之用爲貴。故吾不欲論舊世界之英雄。亦未敢語新世界之英雄。而惟望有崛起於新舊兩界線之中心的過渡時代之英雄。竊以爲此種英雄。所不可缺之德性。有三端焉。

其一冒險性。是過渡時代之初期所不可缺者也。過渡者。改進之意義也。凡革新者不能保持其舊形。猶進步者必當擲棄其故步。欲上高樓。先離平地。欲適異國。

先去故鄉。此事勢之最易明者也。雖然。保守戀舊者。人之恒性也。傳曰。凡民可以樂成。難與圖始。故欲開一堂堂過渡之局面。其事正自不易。蓋凡過渡之利益。爲將來耳。然當過去已去。將來未來之際。最爲人生狼狽不堪之境遇。譬有千年老屋。非更新之。不可復居。然欲更新之。不可不先權棄其舊者。當舊者已破。新者未成之頃。往往瓦礫狼籍。器物播散。其現象之蒼涼。有十倍於從前焉。尋常之人。觀目前之小害。不察後此之大利。或出死力以尼其進行。卽一二稍有識者。或胆力不足。長慮卻顧。而不敢輕於一發。此前古各國。所以進步少而退步多也。故必有大刀闊斧之力。乃能收筭路藍縷之功。必有雷霆萬鈞之能。乃能造鴻鵠千里之勢。若是者。舍冒險末由。

其二忍耐性。是過渡時代之中期所不可缺者也。過渡者。可進而不可退者也。又難進而易退者也。摩西之率猶太人出埃及。以遷於迦南也。飄流躑躅於沙漠間者四十年。與天氣戰。與猛獸戰。與土蠻戰。停辛佇苦。未嘗甯居。同行儔類。睚眦怨

讒。大業未成。鬢髮已白。此尋常豪傑之士。所最扼腕而短氣者也。且夫所志愈大者。則其成就愈難。所行愈遠者。則其歸宿愈遲。事物之公例也。故倡率國民以經此過渡時代者。其間恒遇內外界無量無數之阻力。一挫再挫三挫。經數十年百年。而及身不克見其成者比比然也。非惟不見其成。或乃受唾受罵。雖有口舌而無以自解。故非有過人之忍耐性者。鮮有不半路而退轉者也。語曰。行百里者半九十。井掘九仞。猶爲棄井。山虧一簣。遂無成功。惟危惟微。間不容髮。故忍耐性者。所以貫徹過渡之目的者也。

其三別擇性。是過渡時代之末期所不可缺者也。凡國民所貴乎過渡者。不徒在能去所厭離之舊界而已。而更在能達所希望之新界焉。故冒萬險忍萬辱而不辭。爲其將來所得之幸福。足以相償而有餘也。故倡率國民以就此途者。苟不爲之擇一最良合宜之歸宿地。則其負國民也實甚。世界之政體。有多途。國民之所宜亦有多途。天下事固有於理論上不可不行。而事實上萬不可行者。亦有在他

時他地可得極良之結果。而在此時此地反招不良之結果者。作始也簡。將畢也鉅。故坐於廣廈細施以談名理。與身入於驚濤駭浪以應事變。其道不得不絕異。故過渡時代之人物。當以軍人之魄。佐以政治家之魂。政治家之魂者何。別擇性是己。

凡此三種德性。能以一人而具有之者上也。一羣中人。各備一德。組成團體。互相補助。抑其次也。嗟乎。英雄造時勢耶。時勢造英雄耶。時勢時勢。甯非今耶。英雄英雄。在何所耶。抑又聞之。凡一國之進步也。其主動者在多數之國民。而驅役一二之代表人。以爲助動者。則其事罔不成。其主動者在一二之代表人。而強求多數之國民。以爲助動者。則其事鮮不敗。故吾所思所夢所禱祀者。不在轟轟獨秀之英雄。而在芸芸平等之英雄。

滅國新法論

今日之世界。新世界也。思想新。學問新。政體新。法律新。工藝新。軍備新。社會新。人物新。凡全世界有形無形之事物。一一皆闢前古所未有。而別立一新天地。美哉新法。盛哉新法。人人知之。人人慕之。無俟吾論。吾所不能已於論者。有滅國新法在。

滅國者。天演之公例也。凡人之在世間。必爭自存。爭自存則有優劣。有優劣則有勝敗。劣而敗者。其權利必爲優而勝者所吞併。是卽滅國之理也。自世界初有人類以來。卽循此天則。相搏相噬。相嬗相代。以迄今日而國於全地球者。僅百數十焉矣。滅國之有新法也。亦由進化之公例使然也。昔者以國爲一人一家之國。故滅國者必虜其君焉。藩其宮焉。毀其宗廟焉。遷其重器焉。故一人一家滅而國滅。今也不然。學理大明。知國也者。一國人之公產也。其與一人一家之關係甚淺薄。苟真欲滅人國者。必滅其全國。而不與一人一家爲難。不甯惟是。常借一人一家

之力。以助其滅國之手段。故昔之滅人國也。以撻之伐之者滅之。今之滅人國也。以嚙之脍之者滅之。昔之滅人國也驟。今之滅人國也漸。昔之滅人國也顯。今之滅人國也微也。昔之滅人國也。使人知之而備之。今之滅人國也。使人親之而引之。昔之滅國者如虎狼。今之滅國者如狐狸。或以通商滅之。或以放債滅之。或以代練兵滅之。或以設顧問滅之。或以通道路滅之。或以煽黨爭滅之。或以平內亂滅之。或以助革命滅之。其精華已竭。機會已熟也。或一舉而易其國名焉。變其地圖之顏色焉。其未竭未熟也。雖襲其名。仍其色。百數十年可也。嗚呼。泰西列強以此新法施於弱小之國者。不知幾何矣。謂余不信。請舉其例。

一徵諸埃及。埃及自蘇彝士河開通之後。始借債於外國。其時正值歐洲諸國物產過度。金價停滯。而資本家懷金無所用之時也。乃恃已國之強。利埃及之弱。以重利而行借貸之術。一千八百六十二年。借一千八百五十萬打拉。一打拉當墨銀二元其六十四年。借二千八百五十二萬打拉。皆有所謂經手周旋費者。埃及政府所得實額